

Seigner le peuple, attends le Jugement de ton Seigneur contre ceux qui s'en moquent, n'obey pas aux impies; Souviens-toy du nom de Dieu soir & matin, adore-le la nuit, loüé le long-temps, les infidelles ayment le monde, & ne pensent pas à leur fin ny au iour du Jugement, nous les auons créés, nous leur auons donné la force de marcher, & si nous voulons nous establirons d'autres personnes en leur place. Celuy qui voudra suiure la loy de Dieu la futura, mais personne ne la suiura, s'il ne plait à sa diuine Majesté, il sçait tout & est tres-sage, il donne sa grace à qui bon luy semble, & a préparé de rigoureuses peines aux injustes.

LE CHAPITRE DES ENVOYEZ,
contenant cinquante versets,
escriit à la Meque.

AV nom de Dieu clement & misericordieux. Je iure par les Anges qui se suiuent espais comme le crain du rapet des cheuaux lors que Dieu les enuoye pour executer ses commandemens, par les Anges qu'il enuoye pour punir ceux qu'il veut exterminer, par les vents qu'il enuoye pour faire tomber la pluye où bon luy semble, par l'Alcoran qui distingue le bien d'auer le mal, & par les Anges qui inspirent aux hommes la crainte des peines

*& Kirab
 el tenoir.
 Voy Ge-
 laldin.*

de l'Enfer, & de demâder pardon à sa diuine Majesté, que la punition promise aux meschans est infailible; Alors les estoiles ne paroistront plus, le Ciel s'ouuira, les montagnes marcherôt, les Prophetes & Apostres de Dieus assembleront pour porter tesmoignage cõtre ceux qui ont mesprisé leurs instructions, les bons & les meschants, les fidelles & les infidelles seront separez. Je ne t'enseigneray pas quand sera ce iour, il sera malheureux pour les meschans. N'ay-ie pas cy-deuant exterminé les impies avec leurs blasphemmes? n'ont-ils pas laissé vne posterité impie comme eux que j'ay aussi exterminés? Ainsi j'extermineray cy-apres les infidelles, & malheur sera sur eux éternellement: ne vous auons-nous pas créés de semence foible arrestée dans le ventre de vos meres iusques au temps ordonné? c'est vne grâce que nous vous auons faite: malheur sera sur les infidelles au iour du Iugement. N'auons-nous pas créé la terre pour assembler les viuants & les morts? n'auons-nous pas esseué les montagnes? Ne vous auons-nous pas donné de l'eau douce pour boire? Malheur sera sur les infidelles au iour du Iugement; on leur dira, allez dedans le feu d'Enfer que vous n'avez pas voulu croire, allez dans la fumée separée en trois, rien ne vous exemptera de sa chaleur, & la fuite ne nous deliurera pas de ce brasier, il iettera des flammes noires qui s'esseueront plus haut que les plus grands bastimens de la Terre, & séblables à des larges couuertes de lits extrêmement noires. Le iour du Iugement sera malheureux pour

les infidelles : on leur dira, voicy le iour de la separation des bons & des meschans, exercez vos finesse si vous en sçavez pour vous deliurer des peines de l'Enfer, le iour du Iugement sera malheureux pour les infidelles. Les bons qui auront eu la crainte de Dieu deuant les yeux seront à l'ombre des arbres du Paradis auprès des fontaines delicieuses avec toutes les sortes de fruiçts qu'ils pourront desirer. On leur dira, mangez & beuvez à vostre contentement pour recompense de vos bonnes œuures, ainsi sont recompensez les gens de bien ; Le iour du Iugement sera malheureux pour les infidelles. O infidelles viuez dans le monde, on vous y souffrira quelque temps, vous estes des meschans, mais vous serez malheureux au iour du Iugement. Les impies se moquent de ceux qui les exhortent de prier Dieu, ils seront malheureux au iour du Iugement. Enquoy croiront-ils s'ils ne croient pas en l'Alcoran ?

LE CHAPITRE DE LA NOUVELLE
contenant quarante versets,
escrit à la Meque.

AV nom de Dieu clement & misericordieux. Que se demandent les meschants les vns aux autres touchant la grande nouvelle de laquelle ils sont en differente opinion ? Ils l'apprendront, ils